

回風堂詩文集

PL  
2708  
.E6  
v.2




同風堂文集三

李君大墓表

范梈撰并書

君諱志華字子大號平代曾祖烈祖理漢之受種二  
世契響而望猶德夏之二人當其正也君承其開敏  
其少時固不好弄也歲就塾則思學情特好外書  
博覽大義以類書爲最喜過坐讀無時無處不讀  
年二十餘遭父喪哀毀骨立繼母李氏教  
實雖起家雖疑其非實而南顧猶無嫌大故也以其  
家皆有兄弟之貴其性父而猶道之親其母而尤



Digitized by the Internet Archive  
in 2010 with funding from  
York University Libraries



JUL 03 2001

EAST ASIAN STUDIES

回風堂文卷三



慈谿馮拜君木

李君尹夫墓表

君諱志莘字尹夫鄞李氏曾祖容美祖成之父槐三仍  
世樂善鄉里誦德兄弟三人君其孟也君稟姿開敏自  
其少時卽不好弄七歲就塾同塾學僮時師外出舍業  
嬉戲大譁以競君斂容端坐諷誦無輟長老嗟異目爲  
令器年二十餘遭父喪哀毀骨立情過乎禮李氏故以  
貨殖起家縣延數世畜藏彌殷君旣遭大故自以身爲  
家督有克家之責追惟父祖締造之艱深懼勿勝負荷

隳其先緒遂棄儒書治商業墜驚遷引動致兼贏先世  
故有遺業在上海自君父之歿奸僧乘隙覬覦侵蝕略  
盡君子身往治句駁窮竟盡直其謾疇曩所失終以規  
復云君天性醇厚雖善廢箸不爲剋核剽急之行奉己  
至儉而好行其德重訾無遴內行尤至蚤歲喪母事繼  
母如所生仲弟前卒君撫其遺孤至於成立悃悃無華  
惟實之踐蓋古所稱爲長者者君庶幾近之君以國子  
監生援例授中書科中書春秋四十有九宣統元年己  
酉十二月二十九日卒配陳氏子一玉麒女五適戴適  
陳適俞適某適盛孫一遠繩女孫一未字民國四年乙



卯某月玉麒將葬君於某鄉某原先期以狀來請表墓  
乃撫其實書之以質行道而訊方來

應君墓志銘

君諱啓墀字叔申姓應氏其先鄞人曾祖元治始遷慈  
谿至君凡四世遂隸籍焉祖鴻圖父兆駿君天秉超踔  
十歲能屬文有俊童之譽少長跣弛不循檢局管弦詞  
曲彈碁六博之屬靡勿喜之顧不廢學晝日娛敖夜彌  
其隙秉燭汲汲恒至申旦無幾何學以大殖好爲深湛  
之思凡所撰箸冥心苦索尋躡要眇必期精造迺已年  
十七八卽以文章箸聞州里尋成諸生累試不中第乃

援例以廩貢生就職訓導而君年則既三十矣君美風  
儀意量深遠善言名理每朋曹讌集淵旨眇論連蜷閒  
寫四坐顛倒往往歎絕生平哀樂過人三十以後游更  
憂患寢改常度杜門卻軌罕與世接冷澹孤詭迥異疇  
曩神明內索興象亦損識者憂其不永年也貞疾逡巡  
馴至繇憊以共和三年甲寅十一月四日卒春秋四十  
有三元配羅續聘于楊未行死後妻王亦前君卒子二  
彥開彥重所著詩賦誄贊箴銘百餘篇藏於家并童丱  
交君汔於中歲夙昔微尚默契冥合篇什證擲莫逆於  
心自君之亡形神慘沮若無所麗蓋悽然不知有生之



可樂矣初君病亟以誌文見屬諸孤幼弱葬事未具常  
恐孱病卒卒歲不我與輒申幽贊用酬顧言貞珉之鐫  
期諸異日銘曰  
猗佳人世之好敷昌辭揜天秀才舒舒芳遠條歲以晏  
慤寂寥命之觴曠不耦雪霜降孰華予天寵之又窘之  
媚無止遂盡之恨入土發玉英照來葉芬芒芒

鄭君墓志銘

君諱起鳳字梧生世爲慈谿鄭氏少而慧齊讀書能通  
其故爲文章安徐組練不屑以斧藻自蔽旣成諸生累  
受知學使者聲譽鉉鉉日起省試幾上不中第循資充

歲貢就職直隸州州判非其志也君夷坦直諒與人交  
無町畦衷襟純白恥爲譎觚嵬瑣之行不槩於中往往  
披豁盡意無所回曲任氣敢爲尤善揆事每有商咨片  
言立斷豪剖釐析無不犁然當人人意夙昔注意事功  
雅慕魯連田子泰之爲人旣更世變阨窮隱約黯然無  
復有用世志然困於貧乏猶時時出爲守令幕客嘗應  
南康葉知府慶增常熟楊知縣家驪之聘佐其治行凡  
所贊畫動中樞要政成報最實惟君力是資於是領府  
縣者人人願得君爲助理幣聘踵至率謝絕之杜門教  
子而君亦且逡遁老矣慈谿當革政之初新故代嬗會



計出納尤糾紛不可得理邦人君子僉謂綜核之責非君莫屬君亦毅然引爲己任鉤稽簿籍參互錯綜卒得其要領以報尋被推爲縣署財政長知事楊敏曾王蘭芳更迭倚仗若左右手君抉剔積弊歸於節用平亭息耗民以大蘇久之不樂引去又被舉爲嶼臺鎮自治總董勸農興學百廢具舉鄉之耆老婦幼蓋莫不翕然誦君之德也君雖以恢閎自見而居家約敕雖童稚咸謹聲息門庭之內肅若朝宇二十喪父事母至孝晨昏躬躬積久彌虔年幾四十而猶有孺子色督子絕嚴不中程輒恚怒施撻責聞母一言卽解母歿哀毀骨立幾不

勝喪終喪後遇忌日必哀思涕泣二十年如一日春秋  
五十有六民國二年夏時癸丑五月二日卒曾祖某祖  
某父某母某氏配葉氏子四人滋蕃舉人內閣中書今  
任邱縣知事洪蕃保舉鹽知事敏法政學校畢業生澄  
蕃孫五人賡唐景賢景濤景春景範四年乙卯十月葬  
於丁家隴之山麓先期滋蕃來請銘銘曰

緊纖材文是狃朽無實儒用詬吁鄭君儒者徒銜不祛  
韞以須須罔諧命實靳萬經緯展者寸施未究遺嗣人  
有不信視貞珉

姚燕祖葬銘



燕祖字孝詒慈谿人吾友姚壽祁貞伯子也生十八年  
得瘵疾有間矣一夕歐血死燕祖湛潛耆學家居無所  
得師讀書遇疑義輒籍之埃余至條咨件問不憚反復  
窮竟必貫徹乃已父執中獨暱就余已病猶時時爲文  
抵余請審定嘗報余書言燕祖每奉先生教言若有漑  
於其心視參苓益不翅倍也死之前一日值余旋里是  
夕宿其家燕祖見余至則喜出所業一一相質證余從  
燈光中微察燕祖容色充然似加豐私幸其病當已旣  
寢聞鼾聲甚適天將曙疾驟作余驚起見燕祖藉其父  
臂上血漉漉溢口如注須臾遂絕嗚呼以燕祖好余之

國風堂文卷三  
五  
篤而必使余目送之死其非偶然也傷哉燕祖母楊生  
一子二女長女圓慧俊絕人年十四以痘殤越二年楊  
又死十年以來貞伯哭其女哭其妻悲不可自聊今又  
哭其子焉人生須妻孥何爲昏娶長育顧獨以爲傷心  
涕洟之資死者已矣如貞伯者家庭之樂至是而索焉  
殆盡其畸零慘沮之況尤可念也燕祖之卒以民國四  
年乙卯十月六日踰月貞伯爲葬之某所而屬余以銘  
銘曰

嗚呼是爲吾友姚貞伯之子勛學未達而以夭死其父  
播洎敷土爲埋骨於是魂氣無不之盍歸來只

李府君墓志銘

君諱承蓮字澄廉鎮海人當浹江入海地形縣迴濤波  
環之是曰小港李氏萃居是曾曾子姓蔚爲著族君其  
雋也維君稟天醇素體蹈溫良夙邁閔凶六月而孤母  
丁哭泣眚目益之窮乏育於叔父厯克成立年十四棄  
儒書受命貨殖扁舟浮海贏饒什一取澹菽水旣而知  
及仁守得勢彌彰汔於壯彊業以大起困厄能激斯固  
然矣洪楊亂定鹽筴失正浮食奇民擅牟海利巧法私  
鬻詰姦無方君生長海國周知情僞值當事鰥理齟綱  
主幹者倚君爲助整齊利道弗苛弗漏牢盆所籍垂三



十年課算奇羨而民不敝君之勞也生平任俠赴義若渴自三族緩急至於泛交疎戚靡告不周靡周不饜若其惠矜寡振孤寒任卹施舍斥財無遴而淡於耆欲自奉至簡布衣蔬食裁比老圃天性亮直不樂段貸意所不槩義形於色晚歲優游衡門允孚輿望朋閥曹誼淩諄繳繞片言平亭紛難立解寬以濟物儉以克己嚴以率性誠以及人溫溫焉廩廩焉所爲鄉懷其德里服其教者已春秋八十有五以共和紀元五年夏正七月十六日卒頤神葆和遂躋耄耄仁者之壽僉云無忝曾祖某祖某父敬榮叔父敬恩無嗣君兼後之娶某氏子一



鏡第女子子三適金適樂適蕢孫五厚褻厚哀厚衷厚  
裏厚裳其年十月鏡第葬君於崇邱鄉布陣嶺之麓校  
行述德職在文字宜申幽讚用諗無竟銘曰

猗嗟李君畢畢絕倫在勤不匱克亨厥屯見義能勇爲  
富以仁沖夷貞固亦康其身匪金匪石壽命廓延滂滂  
遺澤流被後昆幽宮佳氣葱鬱千春匪壤之吉而德是  
根維根斯茂是播遐芬無曰不信眡此雕珉

王君墓志銘

君諱紹翰字藝卿奉化王氏世爲連山鄉柏溪邨人祖  
蕃父鏞叔父鈐無子君奉命後之君生而沖夸簡靖讀

書好深湛之思爲文章鯁理入微不爲恢張囂銜之習  
及成諸生卽銳乎有用世志年三十四充優貢生朝考  
授職知縣旣而以親老謁歸主講府中學校旋任監督  
先後數載學子大和自政體改革婁被辟公府勸理庶  
績本縣知事某侯鄞縣知事蕭侯迭資倚辦君展其蘊  
蓄無憚勞勩州閭利害罔勿瞭晰凡所贊畫動中張弛  
而天懷澹退口不言伐事成斂手若無與者識者以是  
服其雅量焉君稟體夙單四十而後奉職盡瘁彌不克  
自支厲最後受任權稅深虞苛燒病民益狼狽務綜核  
簿籍旁午每至申旦日月銷鑠而病遂亟春秋四十有

七民國五年丙辰十一月十一日卒臨歿以老母在堂  
不獲終侍流涕戒其諸子無曠色養語不及它於虘以  
君清德孚誠鄉里而未及下壽遽隕厥生夙抱閔願十  
九湮闕養志之私汔不得遂斯天道之不可究也已配  
蔣氏子四人子讓子詠子諭子莊女一人字方孫二人  
光聞光閔某年某月子讓葬君於某山先期來謁銘遂  
銘之曰

行道靡臻而中以踣胡德之豐而命之嗇有子曾曾維  
家斯克宜百其亨渫此一塞聲銘幽夜用諗無極

朱府君墓表



君諱大勛字研臣姓朱氏其先家餘姚明天啓中有志仁者以醫游杭州遂隸籍爲錢唐人六傳至學泗清歲貢生以仲子貴封奉直大夫是爲君之曾祖祖楷父道曾累世好善門閥寢大母程氏生三子君其季也君幼稟貞性端凝簡靖見器長老遭時波蕩不樂仕進杜門孱守泊然而已咸豐十年十一年杭州再被寇元妻良子蒼黃迸命君跳身出走惟奉先世圖像與俱流連海上殆三年所亂定旋歸故居煨燬君拮据圖度僅乃得復先世故以醫著聞陳藥闐市全活甚溥君至是規復其業用濟族姓任卹施舍敦篤無倦鄉鄙翕然誦其仁



焉性耆金石尤審書勢籀篆分隸靡勿研討既更世變  
溫溫不試益託於豪素以自抒渫廣臚碑版旦晝顚顚  
方員繁簡曲盡微妙嘗語其徒生丁喪亂廬產蕩析匪  
足關慮獨佳書劇蹟性命所契飄零散落無緣復返耿  
耿之懷胡日而釋其高致蓋可想已晚歲自稱胥山老  
農築樂山草堂於山半闌楯花木掩映蕭曠春秋佳日  
勝流名德酒杯流行寤歌盤桓以爲樂笑人事消長漠  
若無與稟命不康嬰疾遂殆春秋五十有七以光緒十  
一年乙酉五月十八日告終家衡邦人君子咨嗟太息  
如何中道遽摧恆幹人之云亡風流渺矣前夫人吳後

夫人金子四承先與吳夫人同殉粵寇難景彝承昌承  
德女一適同邑徐珂孫四祖懋祖彭祖武錫琳孫女三  
皆適士族君神情散朗與物無忤隱居澹退不侈聲聞  
而書名遠暨求者踵屬日本士夫至遣其子弟就受筆  
法寸縑尺素往往見寶云君卒之明年景彝葬君於西  
湖南山之普福嶺以金夫人合兆荏苒卅載未有表揭  
摧傷先德靡所寘念是用甄述景行刊石墓道播休行  
路垂輝方來

范君墓表

君諱淞燾字啓邠姓范氏其先宋參知政事宗尹當高

宗時扈蹕南渡自襄陽徙鄞隸籍焉二十六傳至君君  
竺雅耆學以國子監生兩應鄉試不中第年三十矣母  
病遂不復出君蚤失怙母全淑人中歲病痿痺手足不  
良動止輒倚人君屏絕人事躬服勞給供養積歲月益  
虔從兄澂清幼育於淑人事淑人如母每風日清晏君  
與澂清復輿舁淑人出園庭婦子輩操壺盂從迤迴竹  
樹下或就樹摘獻花果亦時用大母命分散諸童孫以  
爲笑樂淑人病十餘年君壹志習醫學百方治之無效  
常悵悵歎恨先世起家酤釀及君益任卹不樂自封殖  
淑人病少間則棹小舟往還城市遇嫗嫗耄穉孤貧可



念者必解囊周之曰非以市惠庶爲母徼福而已兩娶  
吳皆無出納妾方生子規濂吳方先後卒復娶於陳不  
半年而君病沒臨絕以二子屬澂清且曰第至此命也  
顧母老矣寧堪是流涕戒妻兒毋聲哀蓋自君歿旬月  
而後淑人得聞知也君終世顓顓舍事親外佗事不復  
厝意子職未竟中道決棄依戀之誠忽焉與年壽以俱  
盡斯生人之極哀已君卒以光緒二十八年十一月三  
十日春秋四十有六曾祖懋捷祖上彬父邦璘皆贈官  
如例子卽規濂規議敘知府加二級女二適同縣吳長  
瑛袁家鎬孫一若達共和八年某月規葬君於西郊之

靴脚漕遂揭君至行於阡以諗行道君子

清儒林郎馮君墓志銘

君諱鴻薰字蓮青姓馮氏先世有叔和者五代時仕吳越官尙書家於慈谿子姓引延族望彌劭曾祖應翥祖夢香父允驤朝議大夫母俞恭人兄弟三人伯仲蚤世君其季也幼嘗一目父念其不堪大受使就賈人習廢著術君顧弗樂依韋市廛間用讀書自敕厲久之漸通羣籍旣成諸生益務閎洽凡所披覽旁籀博攷弗明弗措好學深思所性然矣文辭爾雅動依古義下筆成軌靡不瞻舉豐才嗇遇累試累黜以附貢生援例授儒林



郎非其志也光緒十九年癸巳八月二十七日病歿春秋三十君天性耿介矜立名節裁量人物恆傷激直而衷褻純一不爲機詭億詐之行士流依歸以爲長者尤竺內行居家恂恂克踐孝恭事親而外推愛諸父及於羣從門庭外內翕然靡間十歲失恃奉繼母錢恭人不異所生比其卒也宗親戚疏悼傷亡等恭人哭之至於成疾君少喜歌詠矢詩數百清華省淨旣自恨無根著悉摧棄之卒後其從弟并綴拾奇零撰次爲適廬詩一卷藏於家前夫人朱後夫人錢妾謝子一貞羣女二皆適徐孫一昭適君卒之二十八年貞羣始葬君於西嶼

鄉上午里之原於是并撫君行義而爲之銘銘曰  
勛學懋行弗康厥身惟天板板斬以無年藏熱厚地終  
揚烈芬巍巍孤子幸克有聞一世之詘或百其申鐫銘  
玄石用諗後人

陳府君墓表

於虜是爲故清處士陳府君之墓君諱懿寶字儒珍先  
籍奉化明世有蓋者始徙慈谿逮君之身十六世矣曾  
祖大榜祖廉父士芳奉政大夫洞明算數起家貨殖是  
生三子君齒其長君讀書事親隱約不仕體蹈沖簡與  
人无競奉政君鬻財章貢間歲月旅食不恆家處家贍



農田佃庸雜作手指纍百君推誠爛漫不爲苛燒丁壯  
帖帖轉相親附器情寬博尤樂任卹仁心爲質隨物肆  
應田事旣登乞糴踵屬凡所稱量率溢其直都不審覈  
鄉鄰求需必於陳氏曰此家善良不吾取盈也春秋三  
十有九以光緒某年某月某日告終家術凶問旣章遠  
近悼歎孰是人斯而不下壽天道荒矣配顧孺人子一  
訓正光緒二十八年舉人女二適葉來駉葉懋宣孫四  
建風北京大學文學士建雷建斗建尾曾孫一辟塵君  
卒之三十八年訓正葬君於大楓塘之西原訓正榮辭  
懋行著聞州閭君身之不昌庶大其後輒發抒潛德列

諸墓石以聲行路而諗異世

范母金恭人墓志銘

恭人金氏鄞南川縣知縣范君端揆之繼配也其先隨宦來浙譜牒放失莫詳所自恭人十七歸范范故名族仍世著聞仕籍南川君一膺鄉薦服官蘇蜀間尤以廉清自矢卒官成都遺孤皆幼恭人間關萬里卒以喪歸旣歸貧甚節衣嗇食狼狽與子女相保諸孤旣長督飭彌嚴劬勞艱辛幾二十年諸子之不失德范氏之獲以再造恭人力也恭人天性醇淑行止必於禮法溫恭靜約以事舅姑以相夫子以教其後人畢生庸行不欲以



才智見要其所歷有難能者矣年六十九以民國九年二月十八日卒子四承德前卒承祜承黻堅女一適同縣華昌年孫若干人承黻以商承祜堅以學皆卓卓能自奮光顯母德將於是乎在于其葬慈谿馮玕爲之銘  
銘曰

執德則庸儲澤則豐百劬厥躬以保其宗九九柏松封是幽宮千春萬冬

翁君墓志銘

淵衷劭行善祥君子曰翁傳泗豐於其脩嗇於其享逡遁中歲忽焉摧隕有識戚戚以爲悼歎淑而不昌命也

奈何君字厚父鄞人家世高訾歆不自有與人煦煦務  
爲挹損雖處僕御不大聲色推誠樂易視若等夷生平  
澹退不以世紛經懷奉母居月湖養花藝竹用資娛適  
事母恭順造次勿違每賓朋臨况大談劇飲君時離席  
以去久而後反客私怪詫謂盩恆度已乃知其朝母非  
己簡也天性任俠尤惟孤貧是念里媪鄰老多所漑潤  
賦庸匠役恆倍常值嘗謂澹災振匱樂爲名高豪富將  
事無虞弗給若乃單門惇獨隱約無告細人力作勞不  
周食孰加被是孰慰薦是是其尤宜憫恤者也仁人之  
言彌可思已君以民國九年庚申四月某日卒春秋四



十有九曾祖某祖某父某母某氏娶於錢有子七人某某某某某女一人適某將以某年某月葬君於某地不有紀述隱微曷章爰羅石重泉用昭幽暮銘曰  
粵有長者一世之好有銜不渫畫於中道彼仁而閼匪天胡咎雖不天偶人則吟口毋曰弗曜庶侈厥後千齡萬代幽宮是保

董君墓志銘

君諱錫疇字敘九慈谿董氏漢孝子徵士黯後也父喬年授通議大夫嘗以舉人十試禮部不售屏絕世紛超然物外家政纖巨壹付度君君名家年少夙耽墳素米

鹽凌雜非所厝意而部署鯁理秩秩不紊臧獲親附族  
鄰稱能通議君固已奇之矣事親婉孌體及幽隱泊領  
家秉益務綜核簿計出納賓祭饋問日不暇給昏晨寢  
興無曠定省端服儼容忘其劬悴遭母應淑人喪荼酷  
殆不可任旣懼貽父戚更相廣釋入承色笑退而飲泣  
制情飾貌心彌傷矣已病咯血猶強自支厲用慰其父  
一夕病驟革家人欲出謁醫君持不可曰夜定燕息慎  
毋擾大人也憂勞繇亘遂損天年旣歿通議君哭之慟  
逡巡三歲馴至奄忽君體蹈庸行不爲名高畢生猥猥  
獨孝之執色養未竟中路捐棄孺慕之誠邈焉終古悲

痛蒼天曷其有極曾祖秉愚贈通奉大夫祖對青封通  
議大夫君以附貢生授光祿寺署正春秋三十有七光  
緒二十四年戊戌三月十八日卒前夫人方後夫人陳  
子一維鶚女一適鎮海鄭錫麟孫五紹聖紹賢紹箕紹  
裘紹唐民國九年維鶚將葬君於某山之麓述德累行  
實中銘法是用鐫詞貞石永垂方來銘曰

於穆董君曰敘九甫孝於惟孝克繩先武維德之豐胡  
嗇其年保是安宅用康嗣人

童君墓志銘

君諱士奇字樹庠其先曰晏者唐貞元中官松江別駕



自嘉禾徙居鄒之鄒谷是爲鄒谷童氏曾祖載彬祖一  
源父書禮仍世清德著聞譜牒君懷冲履簡襟情高勝  
髫齡英絕卽異常均屬辭爾疋不屑以華藻干進遄迴  
立年僅隸學官一應鄉試遂從幽討文采隱約賁且剝  
矣生平爲學期於實踐夙夜宥密自督絕嚴造次顛沛  
弗改雅度天性溫和與物無忤家居教授顓用經訓匡  
飭子弟推誠委婉不爲強切激厲之言後進之士服習  
風教率不敢自恣放小有過差動相掩匿曰毋俾童先  
生知也光緒季年始行地方自治制君被推爲鄉正周  
咨博采務旣其實舉錯興革謀奏悉當輿誦洋洋益歸

之矣君於學靡所不闢陰陽卜筮星命醫藥之書皆究其微年四十九值小極卽自知不起徧召家人顧言周至神明湛然如無疾者明日日中遂逝民國六年丁巳八月二十八日也妻張氏後君一年卒越三年辛酉某月合葬於某鄉之原子五第錦第德第穀第周第肅女三適杜培榮葉昌鏘朱錦瑞貞風穆行今也則亡宜章幽懿泐諸黜石銘曰

蔚矣君子冲夷淵邵明思通微根極理要隱居求志克葆清妙左規右矩是則是儆德以淑世道不康身超然善死永閤聲聞澗阿寤寐有懷碩人佳城鬱鬱式是遐

芬

范府君墓志銘

君諱邦周字袞美姓范氏范爲鄞西右姓宋明以來代著采譽繇延清世族望愈盛祖某父上庾母唐孺人兄弟三人君用父命出爲世父上庠後髫鬣耆學尋以貧廢嘗從人入山采石厓岸崩厭羣工併命君獨脫不死類有馮相者年十五卽爲商店主計財貨填委出內旁午壹切皆關其手徒侶翕然服君幹局鬻財之家倚辦恐後矣君雖處闐闐造次必依忠信二十已後坐賈揚州垂五十年任時俯仰不爲詭欺久之物情大孚業以



日進天性高亮尤樂周施交親急難視若切己傾橐贍  
護靡所於遴有某君者累以折閱被迫自裁君三拯之  
既彌其空復斥重訾資之營運其後某卒起家大萬感  
君風義涕泣致報君正色屏謝吾曩者自快其私何與  
若事而煩報乎率性上義不矜不伐古布衣之俠殆其  
人歟春秋六十有九以光緒二十四年戊戌四月十六  
日病歿家徙赴至揚州爲位哭者數十百輩遺德在人  
斯足徵已前夫人陸後夫人丁妾蔡子一賡治孫二某  
某君夙耽文藝研誦餘力兼精醫理調方處齊神解冥  
合賡治傳其學遂以名世君卒之二十三年賡治葬君

於某鄉之原潛德永閔勿闡胡章乃泐銘玄石用諱無  
竟銘曰

邈矣府君有蔚其美貞心簡立著聞州里地中蒙難天  
幸不死宜有聲施章其英瑋鬱奇勿泯終隱於市胡拔  
胡擠疇發天咫尺明明肝膽單寒所恃洋洋葉語僉曰善  
士不於其身必於孫子我銘昭之百世以俟

劉君墓志銘

君諱崇熙字楚香鎮海劉氏清規映拔弱歲知名舉光  
緒某年鄉試明年成進士改庶吉士散館以知縣用先  
後三宰鹽城懷仁輔義風政懋著鹽城地瀕海民俗僇

恣好爭吏胥持之緣爲姦利君訊鞫勤敏不稽時日按  
事下牒立口立斷隸役俠侍噤不得施民用勿擾遇事  
務窮物情好惡從違必公是準誠信章章孚於湯邇風  
裁嚴峻不畏彊禦豪宗右室干請俱絕上官親嬖入境  
徵賄君條其罪禽而撻之倔強忤上終絀吏議君旣去  
官鹽城人引領南望待其復來東南村聚田更野老每  
見河上義舸巨幟輯濯而過歡喜走告僉曰劉使君至  
矣旋悟其非鳴嗚而退興化李詳僑居河濱婁聞斯語  
所由爲之賦廣謳者也自君歸田會值政變鄉人以民  
望所系奉君知鎮海縣事君義形於色勉任其難廉明



慈惠猶曩之績未幾引退優游衡門樂道自適以民國九年庚申某月某日病歿家衡春秋幾十有幾君天懷亮特尤重倫紀在官之日旌章名節汲汲不皇遺文隊簡多所甄彙冀以先正疋言扶植民德復推大校序陶淑後進片智單行動加獎扇縣之才秀得所依歸成學發聞連翩接踵儒吏之設施故不侔於常均已曾祖某祖某父某配某氏子若干人孫若干人逾年十月葬於某鄉之原是用追懷懋德勒銘重泉銘曰

不爲文儒而爲良吏未畢厥施蘊奇入地衢歌巷泣思君風義餘澤所被以利後嗣

楊君墓表

君諱璘字貢琛姓楊氏其先越州人宋崇寧中有煒者嘗官明州後遂隱於鄞東南之櫟溪十三傳而至大名明萬歷間官雲南楚雄府同知罷官歸復由櫟溪徙西成鄉逮於君十世矣曾祖德賢祖啓仁父錫累世飭行流聞譜牒君生而開敏長益幹達年二十三喪父及兄有第四人未畢冠昏君以仲子承綜家秉比於冢督教之數學授之家室內外秩秩謚無間言先世故以商業起家君益推引其緒游金華歷江西潯陽往復動致兼贏昌大家業惟君之力而推財讓產昆季悉洽平準多

寡一毛不以自私里黨稱譽以爲有繆彤姜肱之風天性耆學縻於商旅末由振厲居恆戚戚以爲歎恨嘗與里中父老就辨志書院勗立學會冀用實學棣通風氣是時科舉未廢士流方羣鶩於速化之術君知微察來獨以名器象數導衆先路覘世之君子所由彌服其前識也春秋四十有八以清光緒三十二年丙午十一月二十三日病歿家銜配陳氏妾陳氏沈氏男子三貽訓貽詔貽誠貽詔後君四年卒女子二適王適林孫四芳培芳墳芳圻芳垓民國十一年壬戌某月貽訓貽誠葬君於西成鄉七里堰之原茂行清德永閔幽光不有紀



述隱微曷章是用徵曩聞刊嘉石聲行路諗來葉

回風堂文卷三

回風堂文卷四

慈谿馮旌君木

馮君墓碣銘

君馮氏諱慎餘慈谿籍匠者徒君之先盛明世曰叔吉  
布政使官湖廣聞於時十一傳至君微祖松壽父金福  
著內行淳以樸君有弟蚤不祿布政後唯君獨性溫溫  
不世競食賤工有儒行療親疾兩刲臂或詰之深自諱  
行之懋宜長年戾中壽嘗哉天歲丁巳春正月十三日  
君病歿六十六君歿歲葉若曹先後配子四人其二逝  
葬君者仲與季以伯叔祔君阡樂洩洩從黃泉季昌世

學爲士大君門將在是牛之山青谿谿銘墓石族第并

姜君墓志銘

君諱瑞麟字石琴世爲丹陽姜氏祖武哲父佐雍仍世  
潛德不著仕籍君生具異稟劬學多聞弱齡英瑋神采  
外溢名流耆宿見謂弗如光緒十一年乙酉以異等充  
選拔貢生十九年癸巳舉江南鄉試南北往復聲譽藉  
甚累試禮部汔於靡就沈滯京曹循例補外值庚子難  
作海內繹騷君悲宗國之陵夷痛我辰之安在褰裳而  
去遂從嘉遯孤踪介節超然遐舉蓋自是黯黹不復出  
矣家居隱約用文史自稠適物論升降漠若無與顧生



平蘊蓄百不一究意氣鬱沈不能無所抒渫凡鄉政興  
作兵防敷設商咨關白旁午畢會從容肆應動奏殊效  
家閱戶訐就君取平令長賓敬奉爲準度庶幾所謂清  
光粹範振俗淳風者也君器情寬博與物無忤每朋儔  
燕集排調錯出傾靡四坐尤瞻鑒識燭微審幾言必有  
中甲午會試同年生南海康祖詒伏闕陳書請更成憲  
輦下聳動欽其風烈連牋署名者多閔俊茂異之士君  
獨默默不肯下筆退而語人危言譁世黨禍將興吾爲  
此懼矣財及五稔其言竟驗嘗客戚屬家會遭盜警橫  
刀列炬聲勢謹譟君已就寢探首帳外徐曰身有羊裘

聊堪取暖盍亟將去緩急人所時有何匆匆爲羣盜相  
顧愕眙逡巡自去其寧謐孚物如此夙昔微尚雅在文  
字抱能自歆都不寫副身後甄錄十九放失識者唏焉  
君以民國十年辛酉九月二十四日告終家衡春秋六十有  
六遺命輸三千金入官用濟荒政元首褒其樂施道路  
高其行義無德不讎後必大已配趙夫人前君幾年卒  
子二人若選拔貢生今官紹興縣知事可法政大學學  
士分省安徽任用縣知事孫四人嘉猷漢猷慈猷奉猷  
君歿之三年若等奉君柩與趙夫人合葬於武進西鄉  
趙家莊以君名德於法中銘敢鐫玄石下聲無紀銘曰

有碩者儒一世之寶蘊奇勿宣畫於中道天衢榛塞退  
老於鄉十步之內播其烈芳淑世未能淑鄉其可扶植  
風政豈不在我我鄉我邑亦孔之夷官民悅喜有聞如  
雷安時處順適來適去昭昭白日忽焉已暮務旣其實  
不名之睎千秋萬世後有累欵

葉君墓表

君諱璋字又新姓葉氏其先當明季自慈谿石步村遷  
定海清康熙間徙定海于昌國而更舊治曰鎮海遂爲  
鎮海人世居東管鄉之沈郎橋逮於君十一世矣曾祖  
啓芳祖志禹皆贈榮祿大夫父成忠二品銜候選道誥



授榮祿大夫母湯氏繼母夏氏皆封夫人有子七人君其叔也以父命出爲叔父成孝後自幼卽異常童讀書多神解下筆卓犖驚其長老嘗從太倉陸御史寶忠游京師學以日殖顧不喜治舉子業自以其父用化居起家非明積著息耗之理將無以繼世業則益研討商學覲緩急藉手自效天性好善推衍先緒旦夕如恐不逮凡所設施一躡榮祿公之故迹以行榮祿公以高訾碩畫與賈胡競逐參循彼法普興工藝縑絲造燧所營度彌廣作務手指動累千萬自公卽世主辦者以稱息寢微或議罷業君力執不可先公之爲非以澤己也單貧

寒細食於其力者幾何賦庸雖薄育養是資倉卒披解  
於何取給卒寢其議榮祿公豁達樂施晚歲斥金大萬  
就上海建設澄衷蒙學用漑後進君謀於昆弟輸十萬  
金附益之規模益恢廓矣君簡靖和易雖處豐厚不異  
布素賓接士流務爲挹損遇事能探其蹟長商蓄賈準  
時占物恆與參懷徵貴徵賤靡不中度物情歸仰奉爲  
職志生平篤於友愛黽勉相保不以異財有所私某歲  
亡其一弟悼心失圖日月弗殺會當政變後綱紀弛散  
彌鬱鬱無以自展遂築室杭州西湖浩然長往不復與  
聞世事讀書樹藝永從嘉遯棲遲十載遽謝人世稟命

不融踈足中道有識者所爲悼善人之逝而歎天道之不克終也君以國學生用輸粟功誥授通議大夫三品銜候選同知卒於共和十二年癸亥十月二十三日春秋四十有三配包氏封淑人同縣宣城知縣包宗經次女生子一謀道女二適周適虞側室彭孺人生子一謀通女一適徐越三年乙丑九月謀道兄弟將葬君於東管鄉之原長才懋德遂閔幽暮輒申述一二列諸墓石行路樵牧期無毀傷

鎮海方君墓表

君諱積球字彭年鎮海方氏方故鎮海右姓聚族柏邨



蔚起佳勝君以名家後進領袖英絕清規映拔門行彌  
箸弱年隸籍學官遭時板蕩不求聞達鄉居底厲務以  
精進彊執左右風政義之所在冒難赴之意所不概持  
而折之始領鄉約尋長自治候民病利用準張弛摧彊  
扶弱匪威是惕嚴以辨類毅以裁事明以審幾定以御  
變州史章其功言令長以爲矜式通方開敏動中倫慮  
彬彬乎羣流之上識而邦閭之公士也已家素高訾累  
世滯驚輶舶四出建標列肆充牣都市革政而後驟致  
折閱或勸稍稍蓋匿徐圖恢復君笑而謝財賄流轉譬  
若水然久遏一家無是理也料覆簿錄錙銖必直凡所

逋負一夕盡償曰負累猶可負心奈何蓄儲雖罄寤寐  
斯寧所獲不既豐乎寢尋中歲游更憂患公私填委不  
有其躬遂以民國三年甲寅正月十八日病歿家衡得  
年四十有四凶告既布弔者累千薦紳鳴邑婦孺流涕  
昊天難諶殲我國紀吁其慘矣曾祖亨吟祖喬父桂母  
葛夫人夫人有姪爲君元配愔嫺淑慎流譽三鄰自君  
之歿綢繆牖戶形茹神恣蒸蒸家問恃以弗隊蕉萃七  
載從歸大暮是生三子善堯善堊善堊十五年丙寅合  
葬慈溪汶溪之西隩輒述辜較勒石墓兆不誣不溢庶  
昭無止

林君墓表

君諱堯字望山姓林氏其先蓋出於閩宋時有保者扈從高宗南渡始自福清遷鄞保子樸復由鄞遷慈溪遂世爲慈谿人曾祖廷昌祖玉亭皆贈朝議大夫父冠千授朝議大夫母馮恭人有子三人君其季也幼而英發讀書具神解七歲就傳見器耆宿旣通諸經命筆纒纒動多振奇每應童試坐文字不中律令屢遭擯落父師戒之則曰削趾就屨痛其可忍人生寧必以科第顯乎嘗被聘新陽錢知縣某某佐其治行文移牋牘率倚辦君豐辭瑋論隱動僚案旣而不樂引歸端居穆清弗豫



外事蕭晨芳節恆與二三朋舊周旋尊俎諧笑作適如是者久之而君乃脩然老矣君天懷澹定紛華靡麗夙所弗尚先世故有遺業在上海歲入饒給絕不以自恣侈然能急人之急噓寒贍乏累斥巨貲無吝物情歸附稱爲長者君以國子監生輸粟授奉政大夫賞戴藍翎光緒三十一年乙巳六月二十六日卒春秋五十有九聘室馮元配鄭繼配鄭李子一志堅繼配鄭所出也女六適朱適馮適陳適秦適應適錢孫五曾詒曾謀曾訓曾論曾詳君卒後二十一年丙寅志堅治塋於縣東鄭畧初元配鄭之歿當光緒元年乙亥歲久厝壞先營兆

李家隩旣下窆矣懼動體魄不敢播遷志堅乃奉馮及所生母鄭繼母李與君合葬而別以其亡婦馮從葬前母亡禮之禮庶彌歆憾並書墓石以告後來

清故奉政大夫董君墓誌銘

君諱禮隆字午卿姓董氏以國子生輸饒授職府同知先世自鎮海徙鄞遂著籍焉曾祖炳乾祖詩墅父思曾母婁宜人兄第二人君實居長材知深美弱齡能文心誦手書動多振宕長老歎爲俊才輩流服其英絕清聞茂譽立於州閭邁會舛午溫溫不試杜門幽討惟以名器象數之學豐其蘊蓄求爲可知不知亦已外內通介

邈哉晞矣君天性敦摯孝於事親旣以父衰暮不任家政受命綜攝服勞無斁事無擅爲行無獨成賓祭有經出內有序是曰家督嚴君賴之春秋二十有九以宣統二年庚戌四月二日病歿家衍盛年無祿遽凋華采念蓄我之不卒棄家人而大去彌留悽愴目不瞑已配袁宜人後君八年歿子一景謙女三長適陳次未字次適吳君歿十有五年歲在丙寅景謙奉祖父命葬君夫婦於鄞東前堰梨花山之麓穆行永閔匪文曷彰是用鐫銘墓石昭諗來許

有飛而隊有濟不旣有晞不遂藏熱厚地身雖逝矣而



子克繼克竟君孝君心庶慰梨花鬱葱昭君風概前沈  
後揚百世可示

余君墓表

君諱志伊字覺先一字華三鎮海余氏祖賢濱父立槐  
母鄭兄弟六人君班在四君祖父用商起家迄君三世  
皆從事廢箸簡樸奉法不苟立同異一家悛悛蔚爲門  
風君性韻疏峻獨以局力自見鬻財江浙間諸所營赴  
動多踔遠接構非人馴致折閱君無懟色曰吾雖亡訾  
未至罄匱小節用度猶敷贍生但以此累同產則可念  
耳及議異財卽自居湫隘而以新屋讓諸兄弟諸兄弟

勿欲君曰毋以爲也兄弟誠愛我安吾身毋寧寧吾心  
乎卒讓焉君雖治商業雅不屑與時徵逐輕財尙氣泛  
交疏屬多所將助中年好酒酒酣以往忽歌忽哭如有  
甚不得已者自異財後益漫爲亡訾省黠者伺其有酒  
所詭詞哀之或長跼泣下君略不誰何輒傾所有以濟  
累受欺給懍焉自適坐是業益落境益困遂終其身年  
四十有七以光緒某年某月某日歿配俞繼配劉子五  
巖允采崑嶠霖女一適鄭皆劉出也君歿諸孤幼窮空  
不能自存劉忍死撫孤孤皆成立巖長有文行見重鄉  
先達被資給游日本或以道遠尼其行劉毅然遣之迨

巖歸省復挾幼弟霖以出又有尼之者劉又遣之辛亥  
革政巖學成歸國有所圖赴陝西遇盜虜之去劉聞夷  
然曰吾兒能愛人必無害旣而果得歸劉以民國元年  
壬子某月某日歿年五十有九孫五本年埏年申年鑫  
年益年十六年丁卯某月合葬於縣北鹿山之麓餘杭  
章炳麟銘其幽慈谿馮并復次其行義揭之於阡用諗  
行道君子

清故通議大夫三品銜浙江補用知府況君墓志  
銘

君諱周儀以避國諱更儀爲頤字夔笙臨桂況氏明蘇



州知府鍾之裔孫也鍾籍江西靖安數傳徙湖南寶慶  
明末有一幾者復由寶慶遷廣西是爲君之七世祖曾  
祖世榮祖祥麟嘉慶五年舉人並封通議大夫父洵道  
光二年進士官河南按察使授通議大夫母許淑人生  
母李淑人君受天雅性髻鬣媚學神解超朗目所染著  
胸卽儲之心所披豁手卽隨之十一歲成諸生文采琦  
瑋辟易曹耦學使者榜書矜異目爲瓊寶年十八充優  
貢生二十一中式光緒五年鄉試遵例官內閣中書廛  
迴京曹靡所抒渫尋以會典館纂修敘勞用知府分發  
浙江並加三品銜不槩於懷浮湛而已南皮張文襄公

之洞督湖廣瀋陽托活洛忠敏公端方督兩江欽君才  
望先後禮聘署之賓職文移牋奏率與參懷君從容贊  
畫動中倫脊嘗爲忠敏斟訂金石零文隊簡多所提正  
旁籀博稽莫不瞻舉夙昔尤精聲律官京曹日益與同  
里王給事鵬運以詞學相摩擢託音閒寫互有述造閱  
約要眇悉協分刊伶倫播其芳逸文流以爲職志清尙  
高致靡得而睇已辛亥而後棲遲海濱憂生念亂但有  
喟息性故豪曠酒歌合還放於所好遘會輒張寢斂恆  
度察言避色恐恐若浼盛會稠坐樂笑喧厯往往仰屋  
卷舌不羈一詞執謙自詭益巽益激內鑠於孤憤而夷

坦以窮年茲可謂憂心悄悄危行言孫者也春秋六十有八以民國十五年丙寅七月十八日病歿上海寓次配趙淑人繼配周淑人卜淑人子二維琦維璟女二長適平湖陳學次字慈谿馮貞用皆卜出君生母李前葬湖州道場山君歿一年所維琦維璟用遺命奉君柩與周卜二淑人祔葬焉側室施歸君數月而君歿施銜哀矢志克葆端操貞疾侵尋馴至奄忽距君歿未一稔隨瘞瑩左從其志也法宜附書其銘曰

有瑋者況苑於桂林曾曾纓紱滂澤下覃誕育夫子玉質金心弱年發藻卓瑩北南京華孤宦委蛇微省隨牒



南圖蹙蹙靡騁質難文肆天假之鳴珠玉脫吮瓏璽其  
聲匪曰昌辭究極墳典意林說苑蔚其述撰晞髮海濱  
高餓自顯惜誦致愍反真晬晚道場鬱鬱永閔通才谷  
音於邑萬古造哀

洪君墓表

君諱德生字益三慈谿洪氏宋南渡時龍圖閣學士光  
祖自新安遷明州仲子遷官明州刺史始卜居今慈谿  
之漢塘子姓蕃衍周塘而聚族逮於君二十六世矣曾  
祖某祖某父某母謝君生而冲異幼而耽書不倦家世  
商也稍長從父游上海益研討輕重計數之學見器蓄

賈俾領錢肆錢肆者與羣商爲錢通會合貨幣稱貸而徵其息諸貨殖者藉焉君操制贏縮壹切必準之平恥以詐譖取羨邇迴三十年所商聞洋洋溢海上矣天性尙義務旣其實雅不樂爲名高光緒庚辛之難關中荐饑君集十餘萬金振之無何淮徐大水又振之如前大吏高其義議於朝獎其子舉人卒辭不受君雖游於商而襟情高勝有士君子之風中歲喪偶宿儒梅先生調鼎以女妻之先生孤介忤俗工書矜重不輕爲人役獨謂君佳士天曜日朗往往就君作適談諧悅喜下筆數十紙立盡君得之以爲瓊寶也五十已後居鄉隱約不

復與聞外事顧好義勿衰浚河渠治梁道立橫舍鄉政  
興革率引自任嘗語其徒公者私之積積人成家積家  
成鄉鄉之不治家於何有吾非公是先亦顧其私耳急  
公之名所不敢冒也其篤誠不欺如此春秋六十有二  
以民國十年辛酉二月八日卒元配葛繼配梅子承祥  
承祁承祓承祁後君一年卒孫丕烈丕然丕熙丕明越  
七年戊辰承祥承祓葬君於所居鄉之西原輒次行義  
劄石墓道不誣不飾以諱行路君子

朱君墓表

君諱人儀字虞廷姓朱氏先世德清人明季遷鄞曾祖



士傳又自鄞遷奉化遂隸籍焉祖振芳父遠謨爲縣司  
征吏奉公謹厚從不以一介擾人加賦議起鄉民遷怒  
縣吏羣聚叫囂迭燬屋廬顧相戒勿侵朱翁家曰朱翁  
長者無與若事也君夙承庭教慈祥惻隱穆若性成鄉  
隣急難州里義善之舉苟力所逮靡不傾囊橐以赴每  
值饑歲輒募巨貲移糴他郡粟而以常值鬻諸人聲卽  
復之所全濟無算嘗董育嬰堂事堂設規條備然主保  
育者多庸窳不稱任君婉篤勸喻提攜撫字務旣其實  
嬰稚果腹而嬉終日罕聞嬰兒聲貧丁弱媪幸其兒女  
之得所竊竊私慰者戶相望也奉化地寫僻士不說學

溺於科舉婬陋之習取足媚世而止君患民智之錮蔽  
與二三耆舊勗立鄉學禮聘大師經史而外兼以名物  
象數牖導風氣績效旣著踵而起者如林君每自憾作  
始簡承學日衆舍隘將弗能以容謀拓地益建橫舍用  
廣造就料材賦匠旦晝顓顓功緒未汔而病俄作病中  
旁皇牀第猶時時考問工役令無中輟明年病小損復  
彊起董其成神恣形茹卒以勞殉赴布之日遐邇悼傷  
僉曰胡天之酷也孰是人斯而奄忽無祿也嗚呼是可  
悲已君卒以光緒二十五年己亥某月某日春秋四十  
有七前夫人呂後夫人呂方汪子一文炯女一適同縣

張澄孫二兆基兆業君卒後三十年文炯始葬君於縣北郊之原維君冲懷淵量畢生黽勉惟義之執內美淳備宜享遐紀曾不五十而僦函告終隆施嗇報爲善曷勸是用撰次行義勒石墓道並聲之銘詩以式鄉里而諄無極銘之詞曰

粵有善士智公神清開其戶牖抱義獨行緜緜先德華實草莽繼志述事風氣日上居鄉隱約不爲名高慰枯問瘠沃以脂膏珠米千囷玉乳百道羣尪衆稚克完克保哀我顓蒙漫漫待曉孰提星辰與爲光皎精廬卓犖妙選師資騏驎先路來吾導之羸糧景從十百其徒云



誰之處夏屋渠渠乃營爽塏乃興版築綢繆拮据勞其  
杼柚勉力務之匪勞伊病齋志九幽遂櫟大命已乎朱  
君有蘊弗宣瞻望板板胡然而天閼寄於天藏熱在地  
子孫引延以俟百世

陳君墓表

君諱綱字載誠一字笠安姓陳氏先世籍樂清明初諱  
石盤者始自溫州遷餘姚十四傳而至君曾祖某祖某  
父贊宸母某氏累世清德趾美家牒兄弟六人君次在  
四幼漸庭訓造次顛沛必於禮法長老悅喜稱爲家寶  
嘗游海濱猝有寇警衆皆犇竄君獨奉其父母指麾臧

獲從容整暇神色彌定雖在弱齡端序則見生平自奉  
至約不裘不肉以終其身顧樂施與居鄉任卹散財弗  
遴飢餼之粟寒周之纊燭孤榮獨多所將護遠邇播其  
仁聞里黨以爲長者天懷超澹無意聞達一應都試遂  
從嘉遜劬學媚古懍焉自適誦習之暇尤耽藝事繪畫  
絲竹靡弗精審書勢適勁求者踵屬榜題券冊日給不  
贍每語其徒人生材智要有所渫致勤小物無虞橫決  
吾非好勞庶期寡過而已六十已後率性律物日進益  
嚴每刺取史書故事可資勸懲者排類好寫箸爲家誥  
如此則善如彼則否子姓觀感相戒不敢爲非一門彬

彬嚮風矣民國七年戊午九月十日告終家衍春秋七十有一配葉氏繼配楊氏羅氏男子子二愛珍迎祉女子子三邵某胡某徐某其壻也孫男三繼美繼華賡桐以十八年某月與三夫人合葬本縣石堰伏虎山之麓嫿脩淑問不闡曷章是用表石墓兆下諱無極

安吉吳先生墓表

先生諱俊卿字昌碩晚以字行安吉吳氏世居縣西郭吳村明宏治中析置孝豐縣村隸孝豐籍仍其舊潛德懋學擅聞家牒粵寇之難鄣吳舉村被屠祖母嚴母萬娉妻章及弟妹並就夷殲吳氏不絕裁比縣髮先生奉



父流轉飢餓窮谷幸脫於死亂定成諸生追惟家難趨  
若在疚紛華之念消沮幾盡偃蹇中歲貧不自周不得  
已試吏江蘇敘勞累轉至直隸州知州守宰安東一月  
謝去捐勢削迹自此遠矣夙耽文藝兼擅治印盤盂鼎  
碣沈浸追琢恢恢游刃冥合秦漢孤文小石獲者矜異  
等於璆璧先生之書入方出員肅若栗若籀篆隸草靡  
不賅瞻先生之畫渾噩詭詭獨闢隅奧千紕萬變無跡  
可躡既反初服徘徊吳越間齎金求索踵趾造集森然  
起例義取無忸親戚義故推贍指肘七十而後光名彌  
箸東瀛僑士欽其才品爲冶金造象龕置西湖孤山之

麓過其下者留連嗟慕增成故實先生器情寬博不有  
其能深執謙退與物無競自更國變逡遁辟地惟與流  
人野老春容瞻接時政升降略不挂口屬病重聽樂於  
自晦雖賓坐舟旋小乖應對而意色沖然莫測所蘊生  
平感槩一抒於詩幽搜孤造深入其阻晚年屬思益勞  
片辭涵揉恆至申旦家人微止之卽曰非鬱胡申非茹  
胡吐吾自渫所不甘何云苦也春秋八十有四丁卯十  
一月六日告終上海寓邸哀問乍布遐邇悼歎及門第  
子咨度典則相與著謚曰貞逸先生含章抱節騫然遐  
舉彰德旌行不亦審乎所著詩歌序跋綜爲缶廬詩若

回風堂文卷四  
千卷外集若干卷曾祖芳南國子監生祖淵舉人海鹽  
教諭父辛甲舉人截取知縣配施恭人簡靖率素有高  
世之志金石證臯同心黽勉式好偕隱華首不渝先十  
年卒男子子三曰育殤曰涵出後從父曰邁女子子一  
歸烏程邱培涵先生卒前數月嘗游唐棲超山茲地有  
唐玉潛之遺風巖棲谷汲民物隱秀先生樂其高勝夷  
猶林阜憺焉忘反邁敬承先旨謀茲靈宅旋得吉卜兆  
域斯定粵以辛未之冬下窆封隧永寧體魄是用甄述  
景行鐫石塋表上質有昊下諱無紀

回風堂文卷四



回風堂文卷五

慈谿馮拜君木

保黎醫院題名記

吾邑之有醫院也自保黎醫會始也戊己之際邑中疫作罹患死者相屬鄉人有戒心豫謀爲之備於是乎有醫會之集哀貲立醫院城東南隅而被以會之名聘鄞吳君欣璜主之吳君善良士受酬至菲能懇懇不辭辛悴病著手十九瘡鄉人大悅造治者如歸市院隘至弗能以容先是院故僦吾馮氏廢塾爲之因其陋粗加髹飾取足集事而已效旣著乃鬻而隸諸會復次第券納

前後左右曠地基稍稍立矣以鳩財之不易構作之不可以緩則益推大醫會冀合衆力以濟先後署名會籍者若干人以輸以募佐以歲出納所羨而土木僅乃克舉吳君彊毅宏忍兼得諸君子之協贊程功度用持之以歲月五六年間役凡四攻汔於今日廓廡闌楯虛明高曠養疴之室游翔之所袞巨錯列規模粲焉具備此固非諸君子始願之所及抑吳君矢志殫勞以利吾鄉之人者其意爲彌可感也居恆竊謂中西醫術互異其所執持率畫然不得相比傳然海陸溝合耆欲日新彼邦之服物飲食舉不能無所濡染形氣盈虛與時消息

尊生之道宜何所從也吳君以至誠盡人性鄉人之信之也旣堅而諸君子復克相厥成不幸患作乃不至輕委性命於人而灑然有以遂其生追惟七年以前荒榛寂寥人跡之所罕到曾幾何時崇墉峻宇輿轎填咽而墟落之氣昌矣一鄉景從之速斯後此之歲儲月累所以恢拓而光大之者蓋章章可逆億也然則今茲之成功吾猶以爲造端焉耳矣共和五年九月院成吳君援漢碑書出錢人例而題會員之名於壁屬馮升記之輒發其凡用諗方來

陳君造橋碑記



君姓陳氏名磬裁鄞人體蹈勤慎起家梓人周弛任卹  
赴義若渴仁心爲質誰昔然矣縣東大咸之鄉梅谿之  
上爰有石橋當鄞奉化往來孔道秋潦放溢戕枉發梁  
三建三圯物力罷効行者病涉臨流震掉君聞而閔之  
語其人曰石理磽确縣傳實難迅湍所激動致靡陲歐  
西水泥之工冶鐵爲幹表裏堅牢潺湲汜濫不爛不泐  
潰成救敗舍是奚屬斥萬三千金鳩集徒衆刻日作治  
經始民國十年辛酉十二月明年壬戌六月工訖其秋  
大水三至道路隄闕所在漂蕩橋身巋然卒用勿壞鄉  
人念其成勞僉曰微陳君孰與竟斯役乎題名旌寵命

曰磬裁輿誦洋洋以永風譽昔兗州通渠標惠薛公凡  
亭曠陂著稱樊氏君世籍南鄙匪涉疆界齊民超舉在  
位靡責而聞難踔奮取懷相恤善推飢溺之私克成溱  
洧之濟任德果行彌可頌已遂爲之詞曰

相彼崇梁於梅之溪曷墮其成昊天疾威民亦勞止有  
荒不治漸裳濡軌惟曰怨咨一夫興仁百類具舉徵材  
殊域藉固吾圉相歌孔揚前邪後許楸楸橐橐大浸攸  
禦秩秩斯干克利顛武我徒我御爰得我所西狹通道  
石門啓置孰網維是舉足無忘令聞穆穆溪流湯湯表  
績貞石永播芬芳

是役也鄉人童中蓮實創之懼力不繼簡於作始藉  
君宏濟遂畢鉅績集事於陳而造端於童成務開物  
厥功均也敢援漢綏民校尉熊君碑例兼著其緒用  
誌後來

重脩鎮海後海塘碑記

鎮海故名定海清康熙間遷定海於昌國而更舊治曰  
鎮海治故有城城北濱海關門東西南而北缺焉其下  
爲塘自候濤山迤邐委婉以抵於伏龍山東西衡互十  
許里海水汨勃塘實當其衝城負塘而築塘不固城亦  
不立攷之方志城之築蓋當唐昭宗乾寧四年塘雖不



詳所始要其治之前於城也晰矣千餘年來婁圯婁復  
兀然爲縣北屏蔽盡一縣之境人民安居樂業坦坦焉  
無復知有墊隘沈溺之苦者繫塘之力是恃民國十年  
辛酉之秋厲風自東北來海浪受風衝激齧土擣石塘  
岌岌將沒父老咨嗟以爲大戚縣知事盛君鴻燾謀所  
以繕完之苦物力凋敝無以作始乃合縣人傅宗耀盛  
炳紀李徵五等爲塘工協會牒大吏賦其役汔不得請  
會是歲被災廣人民流離蕩析者遍東南中西人士籌  
振上海所募集不訾宗耀奔走呼籲冀分餘澤以佐材  
費而會稽道尹黃君慶瀾亦以爲請黃君號爲有仁心

所言尤取重賓萌於是浙海關稅務司安德生贊其議  
卒籍振餘得銀幣十餘萬版事克用集經始壬戌二月  
土木工役窮日夜不息雖六七月間迭遭風災隳其版  
築而衛難補敗衆志益奮式砥式遏狂流卒以畢恬翌  
歲八月遂告成功烝徒謳歌婦孺呼抃保障生聚之勞  
非諸君子其疇尸之矣是役也凡修塘若干丈用幣若  
千版盛傳二君倡之盛李諸君和之黃安二君贊助之  
董役者朱彬繩李耘青陳子常江在田劉岳峻余潤泉  
履勘者西人甘福德也功旣汔並建二亭於塘上一曰  
安瀾取稅司及道尹之名名之一曰鴻福取知事及履

勘者之名名之以示旌異以諄後來

上海北市錢業會館碑記

上海當華裔南北要會麀市駢闐貨別隧分僑商客賈  
四至而集廢箸鬻財者率趨重於是就時赴機歸於富  
厚羨靡所貯歆靡所彌均之失也備豫不虞而錢肆之  
效乃著錢肆者與諸商爲錢通合會錢幣稱貸而徵其  
息其制比於唐之飛錢其例蓋肇於漢人所謂子錢家  
者導源清初至光緒間而流益大委輸挹注秉壹切貨  
殖之樞揚雄氏有言一闢之市必立之平錢業之所以  
立市平者要非苟而已也先是乾隆間錢商就上海城



隍廟內園立錢市總公所互市以還業稍稍北漸初與  
南對峙繼軼南而上之櫛比鱗次無慮數十百家發徵  
期會不能無所取準於是復造北市會館統焉楹桷煥  
赫首妥神靈昭其敬也西爲聽事羣萃州處整齊利道  
之議出焉致其慎也其後先董祠祀耆舊鉅子之有成  
勞於斯業者以報功也後養痾院徒旅疾疫猝無所歸  
醫於斯藥於斯以惠衆也它若職司所居庖湑所在簿  
籍器物之所庋閣房宦寮廡畢合畢完館之外營構列  
屋用給賃戶歲賦其賃所入凡同業之倦休者與其孤  
嫠之窮無告者得沾被焉繚垣爲巷署曰懷安資出有

經而緩急藉以不匱何其蓄念之緜邈願至歟自商政  
失修市師賈師之職曠絕無聞闐闐之地散無友紀而  
錢業諸君子獨懇懇務尙同羣諮衆力以集是舉大而  
徵貴徵賤展成奠賈之則小而相通相助講信修睦之  
爲胥賴是以要其成旣均旣安百渙咸附汔於今日修  
葺有常啓閉有時張皇周浹互三十餘年而輪奐之美  
猶昔高明悠久有基弗拔然則斯業之日新而光大其  
氣象可睹也秦君祖澤屬余爲記遂揭其概於石館占  
地十六畝強經始光緒十五年己丑訖功十七年辛卯  
自券地至落成都費銀十萬版有奇創事者某某董役

者某某某例得附書

鄭君遇害碑記

人孰無一死死而志白名立其精神意氣旁薄鬱結乎  
人心者積歲累月而靡有已識與不識咨嗟稱誦猶若  
旦暮指顧間事時不得而刊地不得而閔恩怨不得而  
混淆以身爲人遺生行義若是者雖死不死鎮海鄭君  
望枚以學人居鄉羅鄉人子弟而教誨之形勞自苦強  
聒不舍有宋鉏墨翟禽滑釐之風闢精廬立科條贏糧  
景從者無慮數十百人不諒於衆學舍被毀身以強死  
君故用毅直著聞鄉里旣自任興學益以紆變經俗爲



亟務諸生服習教旨往往舍其舊而新是謀鄉之毗庶  
安於錮蔽交疑互沮時時爲訛言中傷君自治制行君  
與聞其政屬有興革鄉衆四至抗言羣不逞者乘之卽  
鬨然劫君以去至野次歷撫不經之言詰君君壹不置  
辨但曰荷荷衆益囂褫君衣聚酢之旋投君於溷提巨  
石築其顙有司聞變馳至君則旣死矣嗚呼何其酷也  
遜清末造橫塾布於鄉鄙以風會之闊塞頑梗之不可  
以理喻掌學之士橫被陵轢乃至焚燬屋廬一發而不  
可猝制者所在多有要未有遘難之慘如君其至者智  
以牖一鄉而不能取信於家戶道以拯時變而終且自

會於禍殃然則爲德者又何所恃而不兢兢哉君諱師  
僑縣之東緒鄉人性孤耿食貧自厲一介不苟取守死  
善道其所操然也君死以清宣統三年七月四日越十  
有七年君之義故後進感於君之以死勤事爲立石君  
死所屬慈谿馮拜記之以昭遺蹟以永承學耿耿之思  
乃爲之銘曰

將咫尺燭萬曹衆罔察怒以馮行踽踽中路躓人之淑  
死不悔息暫窒名則章綴昌辭諄茫茫

五十生日前告誡貞胥貞用

生日慶祝古無此例六朝以前江南風俗兒生一期父

母爲具弓矢紙筆及一切珍寶服玩置之兒前觀其所  
取以驗品性謂之試兒親戚聚集讌享爲樂自茲以後  
二親若在每至是日輒有酒食之事若孤露餘生方當  
感傷哭泣之不暇何事稱觴受賀爲也吾十六失怙生  
又羸弱先孺人劬勞憂閔無復寧帖之日迨六十生日  
不肖謀集親屬稱觴於家用爲歡笑尋以不肖病腹孺  
人殷憂成疾汔用不果越歲疾寢篤纏綿半載馴至大  
故慶未集也而哀會焉每念先孺人食貧茹辛再造家  
室比其老也疾疢憔悴至欲謀一日之樂而不可得母  
氏勞苦之痛所由沒齒不忘者也今吾年五十矣脩名



未立而始滿之期忽焉已至隱微疚恨所懷萬端微聞  
汝曹狃於風習將有生曰燕集之舉是重傷吾心也夫  
欲博朝夕之歡而轉蹙蹙焉以傷其心斯亦不可以已  
乎成事不說是用豫戒小子識之素士之家無高會之  
樂鮮民之生有終身之憂天不我息倘緩須臾六十七  
十猶斯志矣

祭鄭念若文

璜璜鄭君珠規玉矩文儒瑋重皋牢今古外樸中瑩有  
爲有守不爲威惕不爲利誘舉俗汶汶一士諤諤輦金  
如山莫售厥諾荆棘巾地行路大難思以獨掌堙此狂

瀾有志無時命也何咎埋頭沮舍孰發其蔀史公有言  
不困惡激鑽力樸學益閎以實橫經慈湖密理隊緒矻  
矻窮朝靡曠亥午鉤幽縫窅旁證博引列席學子若渴  
得飲君之懷抱冲夸超曠一蹶不振奮而自放戴天非  
高跼地非厚何以解憂有酒有酒中聖徐邈醒狂次公  
肉食媿媿視猶螺蟲朝湛夕湏伐肝戕肺不爲跼生寧  
從回死塗炭濁世逝將去汝倏幽長畢知君無苦繫我  
與君意氣日同里閨跼伏互慰戾窮窮則在天不窮在  
我豈無文章平其坎坷涕泪溼沫相啣相濡靳不余畀  
并此區區十年摯誼索然遂盡哀痛蒼天疇云可問斷

手折足此恨何極哭君一言聞君太息嗚呼哀哉尙饗

祭陳晉卿文

嗚呼陳君望秋而隕埃塵風燭英靈頓盡維我陳君臧  
臧絕倫今有茂士古之俊民履道敦學闇然孱守克與  
利忘不爲貧疚布衣廩廩躬耕教授冲矜淵抱在涅無  
垢君雖澹退實負俠腸趨義若渴懋湏不遑鄉學朋興  
君爲之贊孜孜敦誨勿間晨旰地方自治以懲以勸君  
勸厥成無恤勞怨深湛瑋量不立岸厓輿衷悅喜有聞  
如雷君爛文辭吐奇茹偶卷施謨觴夫有所受澹雅醇  
古不爲恢張羣兒籍湜汗流走僵天挺軼才沈淪可惜



會城人海庶紓心臆旅泊憔悴病訂於中振翼欲上乃  
隕疾風嗚呼哀哉天目之山埋憂無土漸江之水長逝  
終古沈珠於淵蹂蘭於路脩德不報爲善其懼高高閭  
闔疇云堪訴已乎陳君魂招不來幽冥異路人間可哀  
椀無完衣廩無繼粟病妻弱子吞聲而哭後死之責是  
在故人斯言不食敢告鬼神嗚呼哀哉尙饗

八世族祖簞溪府君墓祭文

赫赫朱明忽焉已亡一成中興疇爲少康明德維馨周  
禮在魯畫江申守大啓爾宇有偉馮公蹕起甬東虞淵  
鉤日期使再中惟西王公同扶頽運四明之山忠義輝

映徙戎無策願爲殷頑獨掌堙河亦知其難精誠耿耿  
知難寧退崎嶇山海九死靡悔宛宛骨肉盡室遭捕男  
兒死耳義不返顧虞則不臘魯其無鳩昊天難諶莫壯  
其猶翳巡與遠成仁先後白首同歸久要無負先軫歸  
元王諒斷臂鬱鬱后土佳哉斯氣珠申末造彼日而微  
魚旆中國天實厭之匪天之厭惟靈克相黃龍痛飲九  
原神王顧瞻遺壟鞠爲荆榛崇封表石責在後人豈況  
某等與於族裔妥靈地下其敢他諉馬鬣之修幸董厥  
成煌煌漢官署爲光榮吉日良辰會祭墓下靈旂天半  
彷彿來迓亦有董公是長六狂安神茲土照臨在旁與

西王公左右相並曠野咫尺大名鼎鼎胡塵旣蕩炎德  
重光懿歟三忠來格來嘗尙饗

祭汲蒙文

悠悠昊天孰循厥理有萬其生獨令君死以君倔強死  
則死耳有不死者悲曷能已君之肝膽照人堂堂妙詞  
俊辯出口芬芳持己尺寸絜世短長公非公是朗朗否  
臧談言微中佐以諧笑紛則未解而怨斯召憎茲多口  
有謗如雷舊鄉臨睨蜷局徘徊謠詠蛾眉焉忍終古余  
情信芳寧懷故宇年歲未晏逝將去汝北方佳人庶知  
我者京華冠蓋憔悴不逢孰拔而起孰紓其窮辟書乍



賁室極漸通鬼伯催促遽札厥躬嗚呼哀哉由來直道  
取忌凡庸胡天之毒亦不子容我聞在昔天咫密邇人  
之小人天之君子胡今之天與衆從違衆毀所集天亦  
戾之豈其耄老不明不聰曾是天道亦有汙隆以君毅  
魄飄忽太空乘雲直上盍叩蒼穹嗚呼哀哉尙享

祭虞含章文

嗚呼含章遂至於此平生風義今則已矣自我識君於  
惻之園論文談藝啞啞笑言君之文章澹蕩自喜豐詞  
偉采唾猶泥滓夙昔執持各異趣旨不我謂咸反繩其  
子宛宛弱子實從君游君笑語我勿爲楚咻是非斷斷

迭訟交嘲冰炭之格不礙漆膠一從北學忽拓其軌屬  
詞淵淵遂參異己空水淪漣日趨渺瀰波瀾之成曰自  
今始老馬爲駒一日千里秀而不實未見其止嗚呼哀  
哉去歲臘尾我游滬濱君聞我至驅車相看歸裝旣戒  
不得盤桓豈意一別永隔人天方君病亟我亦在牀我  
猶視息而君則亡冥冥太空君脫網羅涼涼斯世我獨  
奈何嗚呼哀哉尙享

祭錢仲濟文

民國十一年歲在壬戌三月乙未朔越二十六日庚申  
故人馮并遣從子貞羣謹以庶羞清酒之儀致祭於錢

君仲濟之靈曰念若大去山密繼之叔申汲蒙接踵而馳黃臺之瓜其實離離三摘四摘微乎式微荏苒中年故人有幾胡命之戾又及吾子吾子卓卓天下之好於學於行有聞斯邵令聞廣譽沒世勿衰不暇述德祇哭其私自吾交子垂三十載款款之誠久而勿背吾以逐食卜居於鄞跡雖稍間情則彌殷吾每旋里必子是依子或肯來則不我遺深言覈論成是去非意所不槩雖面必違多聞直諒實吾所畏豈無它人孰不子媿如何疾疾戕賊德慧在抱芬芳忽焉憔悴死灰槁木耳目都廢養生有主終於無濟去年臘尾省子病狀子笑語我



他非所望得如君輩話言相向吾臥聽之庶解鬱快我  
聞茲語愈益淒戀亦知爾我無幾相見約以歲首襍被  
來斯與共晨夕十日爲期子曰幸甚必踐是約忍死待  
君期毋爽諾豈意別後病勢日厲謀面一二但有流涕  
交期旣盡欲延匪易并此區區亦不余畀嗚呼哀哉吾  
自子逝忽忽若亡哽汨於臆欲灑無方執紼有日而病  
在牀平生慙負撫枕旁皇遣我猶子薦子一觴甬江帶  
水幽明相望嗚呼哀哉尙享

濠上樓題壁

鄞城靈橋門當市集繁盛處城外爲濠濠之外甬江也

修堤介濠江間循隄而南人煙漸稀江漸荒張君于相  
於其地憮小樓以居樓負濠而面江清虛壙垠人迹之  
所罕至余樂其僻左時時就之于相爲省議士爲學校  
教授恆蹙蹙不得間間則讀書樓上竟日夕無倦嘗從  
容語余吾曹厄於窮空不能不與人事接構顧心實戚  
焉人世歲月若都非我之有獨此荒江窮處展卷一息  
之頃超然有以自遂而神明僅乃得復然且不可常得  
人之生斯世者何樂也于相文辭宗歸方其持論與余  
殊然有所作必互相質證綺辭單調反復鐫繩終且交  
驩迭服通於冥契若行道然異其所出同其所赴其間

離合曲折之故微矣余旣婁造于相久之積與其家人  
習于相故家西鄉惟以妾沈姑子辟方自隨日者吾兩  
人坐樓上江空沅溇回風冉冉飄市聲至乍喧乍寂心  
澠焉若與爲沈浮姑窺戶入喈曰吾疑無人久矣乃嘿  
嘿耶余與于相相視微笑不自知意念之忽恍也會于  
相將之杭州感聚散之靡有定遂取吾心所欲寫者著  
之樓壁間以寄吾無涯之思其諸于相亦不忘於是歟

蔡氏蒙養院壁記

民國七年鄞蔡君同常始構蒙養院於其居西偏良師  
慈保夙夜隆就恩斯勤斯用牖孺稚甚盛至也逮矧一



歲端序則見小藝小節旣游旣習羣幼媼嫗苟疹不生  
父母戚屬抃樂偁誦尸善蔡君洋洋載道蔡君瞿然曰  
此吾母夫人之教也同常何德之有夫人慈谿董氏十  
七歸蔡三年而喪其夫蔡故巨家仍世博施漸耗其訾  
夫人抱節端處從容搏煢服食器皿取足周用交親饋  
問壹準之禮溫恭柔淑儉而不吝不二十年門業大復  
年財四十授秉其子且詔之曰吾以婦人負荷艱鉅審  
分循涯時虞隕越任卹之事自分多闕顧念先德若有  
所疚彌吾憾者非汝而誰蔡君承命兢兢首理先緒義  
莊族學歲久頽弛稽田築室次第贍舉荏苒十載而是

院又以落成幼幼及人是曰養志夫人顧之而後喜可知也於是馮并作而歎曰昔蜀清以丹穴自衛不見侵犯羸政客之目爲貞婦懷清一臺著聞天下彼特能守其先業耳夫人弱年矢志再造蔡室不遠而復寧獨能守植柢旣固有子克家遂乃以隆枝茂幹芘覆後進髫髻嬰兜靡澤不溥於行爲義於德爲仁坤之象曰坤厚載物德合無疆其文言曰積善之家必有余慶君子於此有以覘蔡氏之日昌焉遂書其事著之院壁以勗蔡君兼告童蒙

記梅墟丐

梅墟富室某遣其庸自鄞城齎百金歸庸休於亭金遺  
焉抵家而後覺亟追求之無所得旁皇將返矣見一丐  
臥亭下聊試問之丐詰其數與封識甚審曰吾守若久  
矣舉所拾金予庸庸德丐甚稍稍分金報之丐曰吾誠  
利若金何以是錢錢者爲卒弗受或曰丐其畏禍歟丐  
得金必無所蓋藏卒遇徼巡而敗金且入諸官無奈何  
斯返之矣嗚呼是謂丐之必不廉而特出於計較之私  
也廉吾不得而見之矣然世顧有見利而計較者邪且  
其不受報者又何也

記賣餅者



吾友姚君嘗行市廛間見有賣餅者就之食餅暄甚解衣倉卒間遺其帶帶鈎金也明日途遇賣餅者熟視姚呼曰君昨有所遺耶曰然帶也曰是矣出諸懷以授姚姚心動酬之錢不受曰君遺之吾拾之而返之宜也報何爲姚益奇曰請以是易餅若何曰吾固業是買否唯命耳姚乃盡以所酬市餅歸夫業至於賣餅者窮矣然且見利勿取必返之主者乃安以酬則不受以易則受之其審於取與何如也吁今世而有若人又如之何而不窮也

書錢肆之傭

上海錢肆櫛比凡錢幣出納付度肆必有庸作給犇走  
往復所齎動以累萬計雖細人而責至重主者慎其選  
率以老成謹愿者屬之他雜業亦如是市中稱役是者  
曰老司務司務者江浙間目傭保之恆言猶言管事云  
爾其後業益廣徵發益繁老者不足贍役則壯碩之夫  
預焉年少也亦老之矣張潤生者鄞人上海某錢肆之  
老司務也一日自他肆齎鈔引八千金蒙布其外肘挾  
以歸中途覺有人躡其後張止亦止張行亦行張審爲  
盜疾奔盜追之張懼趨匿一肆中盜躍入遽出短銃擬  
張曰速授我所挾不則死張不可彈發洞其左肘肆人

大駭恐彈及紛紛遍地臥盜前紵張臂張力持勿釋盜  
怒連發二彈一彈中要害立仆盜盡掠所有去肆人逡  
巡起張創甚函胡述所遭語未畢絕年財三十有一秦  
君潤卿爲余言其事余感而書之以見今日之日猶有  
忠於其職舍命不渝如老司務張潤生其人者



回風堂文卷五

婦賢所遺高

王昌碩書



張氏



張氏



婦學齋遺稿

慈谿俞因季則

詩

夜坐聞簫

一痕涼月上簾旌  
寶鴨清香細細生  
如水春愁難料理  
隔牆付與玉簫聲

傍晚湖上

殘雨遙山晴秋水  
水平湖足微風蘋  
末來蜻蜓點涼綠

秋日病起

細風吹雨濕蒼苔  
鎮日重門掩不開  
十二闌干人寂寂

秋陰都上畫簾來

中秋賦呈君木

寂寂中秋夜明明乍霽天星河澹將隱人月喜雙圓無  
語自清絕微吟轉惘然五雲有樓閣今夕是何年

君木二十初度

酒桮灩灩泛流霞金谷成詩我敢誇香雪一枝相對坐  
祝君清福似梅花

梅花

清極不妨瘦寒深如欲言月明春有影香澹夢無痕紙  
帳酣詩味銅鈴警鶴魂羅浮渺何處寥落掩重門

送君木讀書甬江

妾不寄當歸君須求遠志天池九萬里奮翼終自致高  
堂有晨昏是妾分內事凱風吹棘心但期母心慰別泪  
縱如珠不忍滴君袂

夏日郊外

澹澹青山郭外斜濛濛綠樹帶棲鴉夕陽如畫雨初霽  
一路野風開稻花

病中讀先君遺詩悽然有作

倚牀檢殘帙深哀忽來觸先人有手澤宛宛照心目迴  
環三復之涕泪紛相續孤女昔九歲阿父棄之促一訣



如學齋詩集  
十四年思之增慘酷可憐琳瑯海所存祇片玉餘芬雖  
未沫隱痛在心曲掩卷不復誦淒風吹零燭

憶弟揚州

雁聲搖落不成行渺渺江南道路長遙望天涯忽惆悵  
家貧累爾早離鄉

秋夜懷君木杭州

殘葉下高樹疏星橫斷河思深翻夢少夜永況愁多鼎  
冷飄餘篆簾低動細波西泠風露冷衣袂近如何

秋海棠

楚楚海棠花垂紅石闌畔秋風一夜來柔腸爲君斷

君木伴其兄病歸不及就試賦詩慰之

記得送君別親朋共舉杯功名深盼望兄弟忽歸來  
文字難舒抱皇天亦忌才荆花但無恙何必重悲哀

君木以詩見寄卽次其韻

裊裊香煙上畫屏一燈明滅閃秋星蕭條不耐黃昏後  
斜雨斜風帶夢聽

支離病骨思淒然日比滄桑夜似年忽忽情懷誰識得  
擁愁枯坐抱愁眠

墨痕愁寫一窗花六曲屏山掩絳紗應是秋江風浪惡  
夢魂夜夜不歸家

寂寥無語倚香篝憶著前塵總是愁么鳥蹋枝棲不穩  
涼雲吹散一簾秋

紀夢并序

癸巳十月十三夕余病中沈睡恍惚行衢路中  
車馬簇擁行不能前思欲退避而大江又阻其  
後驚濤駭浪不可回首正徬徨間忽見道旁小  
庵中一老尼出招余入庵至佛龕旁有床榻數  
具尼指一榻曰可臥此余愕然尼曰無傷也此  
固汝臥處耳余心忽動遂醒則一燈熒然門外  
柝聲已三更矣因作詩紀之



恍惚復恍惚知從何處行前有輿馬阻後有風浪生踽  
踽傷無偶惻惻心魂驚插脚若無地脚底煙冥冥忽見  
道旁庵老尼笑出迎招我至佛前數榻陳縱橫爲我指  
一榻此榻留待卿我方躊躇間牆外聞榔聲殘夢一以  
醒心中空怦怦噫嘻此何兆思之不可明倚枕還起坐  
愁思搖孤檠

次韻君木贈別

春雨絲絲入畫櫺一燈離思耿愁青東風三月鶉聲緊  
記取征人子細聽

暮游北湖

細風吹透薄羅裳  
青草湖隄一道長  
遠樹雲昏歸鳥亂  
遙峯日落暮煙蒼  
背山樓閣孤鐘出  
隔水簾櫳一笛涼  
去去不知天欲暝  
深林新月露微黃

病夜憶君木

畫屏曲曲掩金鵝  
欲寫相思奈病何  
秋女心情在流水  
佳人眉宇隔明河  
香沈圓夢迷胡蝶  
泪滴孤奩濕黛螺  
折得瑤華誰寄與  
餘芬零落總無多

寄錢靈華

蕤音

秋風颯然至落葉滿前簷  
沈沈下簾箔寂寂掩鏡奩  
昔與君歡聚譚諧無猜嫌  
滴露共試筆對花同畫縑  
今與

君離別愁病空沈淹玉軫誰爲和金針還倒拈相隔日  
以久相思日以添碧雲渺天際獨立起遐瞻

春日卽事

東風忽忽做愁天淺醉微吟總惘然倚袂玉櫳看春色  
梨花如夢柳如煙

午窗睡罷日西斜病裏生涯事事賒幾日晝簷簾不卷  
東風閒煞碧桃花

五月五日弔屈靈均

渺渺江南水招魂魂不歸山川非故宇何處惜芳菲  
讀君木與應叔申茂才疊韻詩次韻題其後



兩生才調世無敵  
壁壘對峙森矛戈  
光氣上燭碧雲斂  
讀之咋舌喚奈何  
驚人奇句破空至  
縱橫豪宕難折磨  
此筆突兀出天授  
風雷變幻供叱呵  
嗟余深閨局聞睹  
無能鹿鹿徒媿媿  
偶然弄筆學吟詠  
秋蟲聲細何足多  
爲君磨墨卷袖羅  
誦君相和之清歌  
一詩獻君君莫笑  
詩就還將酸腕摩

寄君木

桃笙如水夢迢迢  
獨對鑪香耐寂寥  
雨又濛濛花又謝  
故鄉燈火正今宵

送君木赴處州并呈從兄仲魯

春風來幾日陌上芳草生行李旣以戒游子初登程江  
水浩漫漫難爲離別情戚戚毋自苦男兒志長征長征  
亦不惡同行有吾兄有詩可同詠有酒可同傾枯蒼好  
山水歷歷子所經歸來檢游稿增妾雙眼明

我有白玉觴爲君盛美酒願君盡此觴有言爲君剖高  
堂五十餘冉冉成白首君身在道路親心同奔走眠食  
莫任性言語須謹守可歸早歸來無使親盼久

詞

望江南

人去也獨自倚紅闌月冷疎梅銅笛緊天寒脩竹翠衣

單惆悵欲更殘況夔笙云淡而彌雋

清平樂爲君木製客枕繡此詞其端

爲君裁綺料理他鄉睡想得淒涼郵館裏諳盡孤眠滋味  
合歡心事空賒連枝繡出雙花更繡一雙胡蝶好  
扶殘夢還家況夔笙云情深一往昔人寒到君邊衣到無之句未足以喻歇拍尤見慧心

憶秦娥

愁無極翦燈獨坐宵寒逼宵寒逼壺茶漸凍爐煙漸息  
起來還倚闌干側慙慙情味何人識何人識昨宵春  
夢朦朧苦憶

醉太平



三更四更風聲雨聲夜寒吹入銀屏念天涯酒醒  
爐香漸停壺茶漸冰今宵夢也無憑只熒熒一燈

蘇幕遮

柳如絲花似織一院東風盡是傷心色簾外天低雲更  
黑細雨濛濛又作去清明節病懨懨情脈脈如夢紅  
樓隔斷春消息別後天涯應苦憶憔悴如今卻有誰知  
得

錦堂春

寂寞秋千庭院輕寒吹逗牕綃藥鑪茗盃渾無賴帶夢  
過花朝坐對東風凝想纏絲只是魂銷綠陰不解愁

人意冉冉上花梢

點絳脣草用林君復韻

春淺春深離亭一片渾無主故人何處日日風和雨

行色匆匆又是春將暮征車去閒愁無數綠徧天涯路  
況夔笙云評文家遇佳句輒加密圈詞有無一句不可  
加密圈者亦有無一句可加密圈者南宋名賢不經意之  
作閒一見之此境至不易到非渾成而淡不可雖  
非宋人佳詞卻確是宋人詞也是作庶幾近之

山花子題漱玉詞後

情是春雲思是霞玉人千古擅才華贏得頭銜三字好  
女詞家一院西風吟瘦菊滿堂華燭賭清茶料想夜  
深雙管筆共生花

臨江仙

寂寞黃昏誰與遣  
爐煙息息初停  
疎風淅瀝不堪聽  
芭蕉三五葉葉作秋聲  
一卷華嚴剛讀罷  
閑愁懣懣盡還生  
夜涼無意掩銀屏  
欲眠眠不得倚枕數殘星

菩薩蠻

采蘭飾佩爲誰好  
相思迢遞天涯道  
碧玉小闌干  
東風盡日閒  
春愁飛不起  
吹入參差裏  
鶯燕畫堂中  
良時恨不同

蝶戀花 戊戌八月感事和君木

匝地春陰簾不卷  
舊恨新愁惻惻難排遣  
天氣乍寒還



乍暖吳棉纔試羅衣換 十二闌干空倚遍滿眼靡蕪  
莫問春深淺祇有蕙蘭香不變亭亭空谷無人見

況夔  
笙云

風格  
清雋

念奴嬌寄君木處州

畫簾如夢雨瀟瀟正是清明時節擘別東風無幾日彈  
指細桃成雪夜帳燈昏春屏花落顚顚無人識別時情  
緒玳梁飛燕能說薄午獨上高樓他鄉何處望望堪  
愁絕一自樓中人去後日日雨斜煙直篷背青山馬頭  
芳草莫也添悽惻輕陰日暮迢迢天際消息

清平樂寄君木

金鳧煙直月弄疎篴碧湛湛明河天一尺苦憶他鄉今  
夕 笛聲隱約誰家夜涼獨掩窗紗一昔畫屏無寐淚  
絲彈上秋花

菩薩蠻

繡簾纖押敲雙玉玉階風細吹蘭燭燭影碧冥冥扶花  
上畫屏 半鉤殘月小鉤起愁多少單袂倚紅闌露華  
生夜寒

亡婦俞君來歸廿年辛亥八月以腹疾死君遺箸婦  
學齋詩詞皆庚子辛丑已前作是後爲家政所牽率  
米鹽凌雜不復有孑辭隻調矣君死後數月乃始檢

君故匿手施釐訂君詞勝於詩所作又絕少故不忍  
割薙詩則刪存十之四五都寫定爲一卷以付兒子  
貞胥藏之壬子正月馮拜記



附錄

輓聯

夫壻馮旌

君死亦何心將內外諸責任盡付漂流下地上天何處  
更求賢妃耦我來知不遠奈旦夕大解脫未能證果  
藥爐茶竈餘生誰伴病維摩

應啓墀

病十九不治亡之命矣夫豈足爲醫罪獨愁故人旌已  
爾許奇窮全賴內助賢又復摧折之將胡由善厥後  
死萬一有知生者寄而已當能作達觀惟念小子胥所

特以存活僅此病父在多可顧慮者則難免恫其靈

章閨

天促結璘歸縱有倉公奈痼疾 重添摩詰恨最難裴  
迪侍閒居

錢蕤音

爲賢婦爲慈母爲名師屈指此日深閨真無過子 若  
漆膠若琴瑟若骨肉傷心卅年知己更有何人

兄俞鴻檀

厥疾早知難着手 此行胡竟不回頭

兄俞鴻檀

十年來吾顛倒情形殊難細數惟或游或病仗爾在亦  
庶幾放懷每當夢醒更闌聊堪自慰 幾日中雖依稀  
消息猶費懸猜卽半死半生於汝家已不可設想況乃  
魂消魄逝夫復何言

弟俞鴻枏

果然病是贅疣悔不當初從刀圭早着手 況復情關  
骨肉到于今日便鐵石也傷心

從兄俞鴻樞

夫壻文學家兒子幼弱者此後家常心事將付伊誰揮  
泪對秋風豈但爲參差雁字 抱病十餘載撒手片時



而可憐貧薄生涯何曾舒展招魂當古寺最難堪淒楚  
蟲聲

從子馮崇業

疾痛雖十載餘欣宿痞方除重負脫然今可釋 元氣  
才一息屬歎回生無術慈容倏爾渺難親

從子馮貞羣

若教育若會計若中饋隻手操持真足令巾幗生光須  
眉削色 凡朋友凡親戚凡族黨同聲慘慟那不教弱  
弟泣血病叔嚎啕

馮度楊佶夫婦

疾革郡中正值湖湘變故此後懽欣鼓舞慶祝共和誰  
於婦學齋前更添自度曲 辱在門下藉悉文字淵源  
才勞子細商量撮成伉儷忍見秋辛館裏忽賦悼亡詩  
馮彥軌魏友梭夫婦

禮文法式出入郝鍾一身備女中師豈但家庭論教育  
烽火戈鋌蒼黃江漢拭目觀天下事特完魂魄卽神  
仙

外甥徐文備

世變亟矣病勢篤矣一了百了在阿母未嘗非福 內  
政賴之外事咨之而今而後我舅氏何以爲情

私淑弟子聶拙

絳幃設教令德孔昭其顏乎其壤乎是吾黨之泰山梁  
木彤管有輝寸衷私淑若恍兮若惚兮願招魂於黑  
塞青林

弟子錢美

居弟子列已許年窺夫人德容言工隨處足爲金閨矜  
式據醫家言真奇病顧世變倉皇危急問師可從瓊  
島逍遙

弟子羅明宜

受業一二年讀書四五本先生教我我猶能憶抱病



十餘載撒手片時間弟子哭師師竟不聞

弟子羅芳宜

摳衣負笈來從先生游數載辛勤曾向班姑聆女誡  
視斂送終未盡弟子職一江迢遞總慙宋玉賦招魂

弟子羅宛宜

自是女中師記得春風曾坐我 忝爲門下士何堪秋  
雨賦招魂

弟子應曼昭

流涕哭師門從林際春申望故鄉山但覺黯黯有傷心  
色 回頭思往事記閨中秋日讀弟子職能不忽忽感

授業情

...

...

...

婦學齋遺稿

...

跋

先師回風先生既歿長君都良哀次遺稿攜就陳天嬰先生審去取都得文八十首詩五百四十六首裁及全稿十之四五歲月逡巡未遽付槧先是同門諸子創回風社以時致祭有議集資以利剞劂者承風翰將頗不乏人任君士剛籍其成數經紀貯息歷日稍裕則屬沙君孟海謀刊文於南京而蕭山朱君贊卿方以刊詩自任期分別鐫印而彙藏其事寫刻甫竣兵亂俄作斯役遂以中輟任君等懼前刻之散佚末由釐訂也力促都良檢出原稿重加錄定故友洪君通叔襄厥勤勞用能



副速幾經咨度諸緒咸就辛巳四月始授中華書局以  
仿宋字模排印之賢忝領其事悚惕彌殷督過有人幸  
免隕越校勘之責則由何君蒼回任之計全集詩九卷  
文五卷婦學齋遺稿一卷別有回風詞一卷已輯入彊  
邨詞選茲不復刊先生在日嘗言集後宜附錄友人應  
叔申先生弟子朱君炎復遺著若干篇幽草寒瓊無俾  
湮沒各稿經亂猝難檢集用付闕如爾民國三十年辛  
巳五月弟子海門王賢謹跋









